

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2628 del 24/09/2025

Pet de zòmmòrbet va EUSALP, drai to ver de òrbetn as kearn en ecosistem van bòlt ont en de òrbetbèrk van holz

“Discover Mountain Jobs”, en de suach van pèrgòrbetn

[Mòcheno] Va de òchtzena finz as de zboa'sk van leistagest 2025, simzen jungen hom toalganommen en de edizion 2025 van “Discover Mountain Jobs - Bòlt ont Holz”, organisart van Trentin, zbischn Valzegu' ont Fiemmetol, va de Òrbetgrupp 3 va de europeisce strategi ver de alpine regione (EUSALP), as s ist koordinart va de autonome Provinz va Trea't durch der Dinst van Sprochminderhaitn ont ausbendegen nètzn.

Der Òrbetgrupp 3 schauck iber en òrbetmòrk, en de schualbèrk ont en de learbèrk ont, zbischn de òndern sòchen, organisart naiekaitn as òrbetmoglechkaitn en platz va pèrgunterstitzn belln, asou za hòlten ont zuakemmen mòchen de talentn ont za kempfn keing en vortgea' van alptelder. En doi kontest vinnt se de naiekait “Discover Mountain Jobs” (gea' za vinnen de pèrgòrbetn), as haier klòffen bart van òrbetn u'gahenk en ecosistem bòlt ont van ring van holz, gèltsgott en de zòmmòrbet pet de Task Force EUSALP “Multifunzional balder ont pahòltlege prauch van holzmaterialn”.

En pfinsta af de 18 van leistagest, de jungen as toalnemmen sai' u'ganommen kemmen pet en schea' rom va de Arte Sella, bou as de troffen hom de dersteller va de bèlt va de untersuach ont van Forestaldinst. Gian Antonio Battistel, van Zentrum va Untersuach ont Naiekait va de Fondazione Edmund Mach, hòt unterstrichen de bichtekait van europeischn projektn va untersuach unter en doi rom. Valentino Gottardi (Forestaldinst Provinz va Trea't) hòt derklort bos as ist s provinzal forestal dinst ont bos as s tuat avn lòn timer za schitzn de umbèlt ont de lait.

En zboate to, en vrait af de 19 van leistagest, s ist augatu' kemmen pet en pasuach en CFP ENAIP va Tesero - sektor van mobilholz ont van hòcken s holz, koordinart va de learen Giada Mearns. Der trèff pet de learer, de studentn ont de ex-studentn, as iaz òrbetn en sektor, hòt araustrok de bichtekait va de

zòmmòrbet zbischn òlla de spiler van lòn timer za paun au ont pahòlten an ring va bèrt ont tsunt, as geat van korrekt regiar van bòlt finz en de mearer òrbetmoglechkaitn u'gahenk en veròrbetn s holz. S pasuach en de Sog va de Magnifica Comunità di Fiemme ont van bèrk Enrico Ciresa S.r.l. hom an bòlket augatu' as a toal van doin moglechkaitn. De jungen hom auklaup der lust van tscheftmònn Fabio Ognibeni za vorn a kloa's bèrk, as armonischen tovl'n ver strachstrumentn ont klaviar mòchen, ont s sai' belln vernaiern no jarder va òrbet. Der kurz trèff petn Alessandro Arici va Radio Fiemme aa, hòt inspiriart, pet en korasch gem pet de sai'na entra'men ver za paun ont bècksl'n projektn, pet gadult ont lust.

En sòmsta af de 20 van leistagest de toalnehmer hom der magari' va VAIA pasuacht, ont de hom pfunt'n abia as van schlèchts bètter van 2018 augòngen ist an bèrk as van zirkolarbirtschòft der sai' core business gamòcht hòt. Der effekt va Vaia avn lòn timer ist auganommen kemmen van Paolo Sandri, president va de kategori van bòltbèrk'n va de Associazione Artigiani Trentino, as klòfft hòt va de noat za tea' bider organisiarn s aigene bèrk ont der gònze sektor van bòltbèrk'n ver za gem omport en gònze holz as zuakemmen ist. De sai' kuntschòft hòt unterstrichen de bichtekait za mòchen netz pet de glaimen ont vèrn platz ver za gem omport en de momentn va groasa noat ont, en de glaiche zait, za pòcken der moment.

De bichtekait za understitzn de jungen ont za verglaimern sa en de òrbetmoglechkaitn en de platz va pèrg ver za versichern en de doin leneder a zukunft, ist tsòk kemmen van lokal amministratorn aa, de sèlln as de jungen en Rontschai' troffen hom, der vicepirgermoaster Mirko Montibeller ont der asesor Giuliana Gilli, ont de sèlln as sa en Tesero troffen hom, der pirgermoaster Massimiliano Deflorian.

Der Discover Mountain Jobs 2025 - Bòlt ont Holz, ist organisiart kemmen bail en Projekt Support EUSALP, zòmmzuazolt van Programma Interreg Spazio Alpino.

Mearer nochrichtn avn Òrbetgrupp 3 va EUSALP en [doi link](#).

Ibersetz gamòcht van Sprochtirl va de Tolgamoas'schòft Hoa Valzegu' ont Bersntol

(cdt)